

Als erschts wett ich mol en riese Dank an euch alli witergeh
för die veele tolle Komplimänt woni ame dörf entgäge neh
das get mehr all Johr d`Motivation mini Schnetzelbänk vorzträge
schliessli beni kein Anklage vor Swissair wo meint er dörf nüt säge

Trittst im Morgenrot daher bla bla bla bla bla
weiss ich den Text schon bald nicht mehr bla bla bla bla bla
nach de Fehrsehvolksabstemmig em letschte Johr duen ich dromm de Vorschlag bringe
das mer e Zuekonft als Nationalhymne düend „Alperose“ senge

De Bär Mario vom Hasel Zoo klagt mer letscht Sommer sis Liede
obwohl er kei Luxuswohning heig wörd er gärn do en Röfenach bliebe
doch leider heige es paar Tierschötzer sin Omzog nach Dütschland beschlosse
debie wössed die ganz genau det werdi als Bär grad verschosse

Z`Brogg onde muesch vor de Fredensrechter hesch dorscht of em Trottoir os
ond a de Fasnacht esch met em Lärm am Zähni Zobe au schloss veros
Postauto esch no 1 oder 2 wo no d`Stadt ab darf
guet Nacht metenand liebi Altstadtbewohner ond en gsonde tüüfe Schlaaf

De Beführwörter ond au de Gegner vo de Fusion Wendisch Brogg
säg ich do a dere Stell chömmed weder of de Bode zrog
es bringt doch nüt wenn er euch strited enand fasch d`Schnörre verhaued
frässed jetzt zersch emol Umike ond lueged öb er das verdaued

1818 1811 oder 1801
welle Telefonjoker nemmi jetzt wenni e Frog ned weiss
ich chönnt zwar aus Publikom befrage also was ich vo euch wösse wet
wie mängisch euse Kulturverein de Name scho gänderet het

Sed de Schlatter Fretz nömm of de Chäsi esch säg ich zo miner Oma
do het mini heis geliebt Melch eifach nömm s`gliche Aroma
sin Nachfolger de esch au ned schlächt doch öppis fällt mer uf
be dem siner Melch hani komischerwies nach em Zmorge emmer en Suff

Z`Remige a de Gmeindsversammlig chonnt de Radwäg problemlos dore
ond au be eus z`Rinike het fasch niemer öpis zmöre
nor z`Röfenach händ si Ovo gha ond dromm jetzt en Hänger
be dene gohts met em Radwäg ned besser deför aber länger

Woni letschte Sommer be eus dehei do die komische Säck gseh hange
hani dänkt esch jetzt euse Gmeirot no onder die Grüene gange
Jute statt Plastik das chas jo ned si das esch doch en Schabernack
händ die ned wöckli e gschiters Model för euse neu Kerichtsack

Langsam do fend ichs jo schochli gemein was d`Polizei för Trecks usheckt
ed Leitplanke ond Grünenabfuerchöbel wärde d`Radarfalle fang versteckt
also mech verwötschte die jo ned das chani dene grad verzelle
do chönd die no lang be eusre Ifahrtsbräms gone Rosthuffe anestelle

Sed be eus de Obrist Ernst als Gmeindamme duet walte
hämmer emmer so höbschi Fraue wod 1. Augustrede halte
s`letscht Johr d`Irene Leueberger hür d`Christine Egerszegi
ond för s`nächschi Johr heig er scho gfrogt öb d`Frau Merkel ächt Zyt hegi

So för das Johr hätti mini Schnetzelbänk weder absolviert
ond ich frog dromm weder höflich a öb mer ein eis spändiert
aber mälded euch bitte so gli wie mögliche am liebschte grad no hüte
bevor si eus em Sponte en nachem Rauche äno s`Suffe au no verbüte

Der Komedi⁰⁷

Wänd er me bsueche? Ich be dehei onder „www.komedi.ch“

Woni letschte Samstag nömme ganz nüechtern vo de Fasnacht heigloffe be
hani plötzlech Drock of de Blöse gha ond den das goldige Pissoir gseh
ich packen us fang afoh seiche ond was selli säge
scho beni irgendwie benomme vor eusem Wooghüsli gläge